



21. august 2009

UKA 2009/137

Inatsisartut Suleriaasianni § 32 naapertorlugu aalajangiiffigisassatut siunnersuut imaattoq matumuuna saqqummiuppara:

Psykolog-itut taaguutaasup illersorneqarnissaa, sulinissamut akuersissummik pinissaq psykolog-itullu ilinniarsimasut pisinnaatitaaffii pisussaaffilu pillugit tarnip pissusiinik nakorsat pillugit inatsisiliornissamik Naalakkersuisut siunnersuusioqqullugit peqquneqarnissaannik Inatsisartut aalajangiiffigisassaattut siunnersuut. Inatsisiliassaq aamma imaqassaaq oqartussat sorliit pisinnaatitsinermik akuersisinnaanerit, kikkut nakkutilliisussasanersut pillaasarnernullu maleruagassat pinerluttaalisitsinermi inatsimmut naapertuussarneqassallutik.

(Inatsisartunut ilaasortaq Naaja H. Nathanielsen, Inuit Ataqatigiit)

Tungavilersuut:

Siunnersuut manna 1999-imi taamani Inatsisartuni ilaasortamit, Asii Chemnitz Narup-imit siullermik saqqummiunneqarpoq. Taamani Naalakkersuisunit oqaatigineqarpoq inatsit taamaattoq piareersarneqarluni naammassiliivissoq.

Maannakkut ukiut qulit qaangiupput, katsorsaasarnikkulli taamanili allannguutiniq annertuunik saqqummersoqartarsimavoq. Siusinnerusumut naleqqiullugu ullutsinni pisortat tungaanniit katsorsaansissamut periarfissat amerlanerujussuupput, namminersorlutillu katsorsaasartut amerliartuinnarput. Psykoterapeut-it, coach-it allatullu assigiinngitsutigut katsorsaasartut inuiaqatigiinni takussaalereersimapput. Pinngitsoo-ranili imaangilaq inuit pineqartut ilinniagaqarnermik naleqquttumik tunuliaqutaqartartut, taamatullu tarnip pissusiinik nakorsatut katsorsaanikkut piginnaassuseqartut.

1994-mili Danmark-imi tarnip pissusiinik nakorsat pillugit inatsiseqalersimavoq (psykologlov), tassanilu piumasaqaatit ilanngunneqarsimasut nunatsinni inatsisiliornissamut isumassarsiorfigineqarsinnaasut nassaarineqarsinnaapput.

Tarnip pissusiinik nakorsat pillugit inatsit innuttaasut ataasiakkaat katsorsarneqarnerminni toqqissisimasinnaanerannik qulakkeerisussaavoq, aammalu inuit tarninginik sammisaqarniaraanni immikkut ilisimasaaqqaarnissamik oqariartuutitut pingaaruteqarluni. Matumuuna siunnersuuteqarnikkut inuit tarnip pissusaanik ilisimasalimmut saaffiginninnerisigut katsorsaasunik universitet-imi ilinniarsimasunik (cand.psych /

cand.pæd.psych.) oqaloqateqarsinnaanissaat qulakkeerniarneqarpoq, aammalu katsorsaaneq naammaginaratumik ingerlanneqanngippat katsorsartinniartumut naammagittaalliorfissaqarnisap periarfissaanissaa qulakkeerniarneqarluni.

Taamatutaaq inuit naleqquttumik ilinniarsimasut kisimik psykolog-itut taagorsinnaanissaat qulakkeerniarneqarpoq, ilanngullugulu psykolog-itut taallutik sulinissaminnut piginnaati-taanermut uppersaateqarnissaaq, kiisalu inatsiseqarnikkut sulinermi ileqqorissaarnissamut maleruagassat qulakkeerneqassallutik.